
TE HEHEURAA API

I neia i te piha neneiraa no te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa. Te hoo e piti farane i te matahiti hoê.

Nu. 5

Me, 1919

Mat. 13

Aita a te Fatu ra a Iehova e peu ia rave, maorirâ ia faai-te i Ta'na parau i moe i Ta'na ra mau tavini i te mau peropheta. Amosa 3:7.

Te na ô maira te Bibili Baratani i te buka Maseli i te pene 29 irava 18:

Ia ore te orama i faaitehia mai e pohe ai te varua o te taata i reira; e ao râ to'na to te haapao i te ture ra.

TE ORAMA I ITEAHIA E IOSEPHA F SEMITA NO TE FAAORARAA I TEI POHE RA.

Hou a pohe atu ai to tatou peropheta Iosepha F. Semita i te matahiti 1918 i mairi a'enei, ua ite oia i te hoê orama no te faaoraraa i tei pohe. Te na ô maira oia: I te 3 no Atopa i te matahiti 1918, te parahi ra vau i roto i to'u piha mai te mana'ona'o i nia i te mau parau mo'a i papaihia ra, e mai te feruriruri i te tusia rahi i faatusiahia e te Tamaiti a te Atua na roto i te taraehara, no te faaoraraa i to te ao taatoa nei, e no te aroha rahi e te maere hoi i faaitehia mai e te Metua e

te Tamaiti i to te Mesia haereraa mai i roto i teie nei ao, e na roto i Ta'na taraehara e te haapao hoi i te mau ture a te evanelia, e ora'i te mau taata atoa.

A feruriruri ai au i taua mau mea ra, ho'i atura to'u mana'o i nia i te papairaa a te Aposetolo ra a Petero a papai atu ai oia i te feia mo'a no tahito i purarahaere na te fenua i Ponoto e i Galatia e i Kapadokia e te tahi atu â mau fenua ra i Asia i poro-haere-hia te evaneleia i muri a'e i te faasa-tauroraahia o te Mesia. Ei reira iriti ihora vau i te bibilia, taio atura vau i te pene toru e te pene maha hoi no te Epitetole a Petero, e a taio noa'i au i reira na hau to'u maramarama i to te mau taima i mairi a'enei i nia i te pene 3 irava 18-20 e te pene 4 irava 6 Petero I. Te na ô maira taua na irava ra: "I pohe na hoi te Mesia iho no te hara hoê poheraa, te taata parau-tia no te feia parau-tia-ore, ia tae tatou ia'na i te Atua ra, i taparahi-pohe-mau-hia Oia i te tino ra, i faa-orahia râ e te varua: o Ta'na ia i a'o atu i te mau varua e vai i roto i te tapearaa i teie nei; o tei ore i faaroo i mutaa ihoraa, i te faaoromairaa roa o te Atua a taia'i i te anotaui ia Noa ra, i te tarairaa i te pahira, i ora'i e toofanu pue taata i te moana, oia hoi na taata toovau ra." I Pet. 3:18-20.

"I parau-atoa-hia'tu ai hoi te evanelia i te feia i pohe ra, i faahapahia'tu ai ratou e te taata i te tino ra, te ora ra râ ratou i te Atua i te varua ra." I Petero 4:6.

A mana'ona'o noa'i au i taua mau mea i papaihia ra, araara ihora te mata o to'u mana'o, pou maira te varua o te Atua i nia iho ia'u, ite atura vau i te hoê tiria rahi i tei pohe ra, o te taata rii e te taata mana rahi. E ua haaputuputu-hia te mau varua o te feia parau-tia e aore i nehenehe ia taio no te rahi. E taua mau varua parau-tia ra o ratou ana'e ia o tei haapao maitai i te Mesia a parahi ai ratou i roto i te tino tahuti noa, e o tei faatusia i te tusia ei haamana'oraa i te

tusia rahi a te Tamaiti a te Atua, e ua faaoromai ratou i te mau ati na roto i te i'oa o to ratou Faaora.

O ratou ana'e o tei reva'tu mai roto atu i te ora tahuti noa, mai te tiaturi papu i te tia-faahou-raa hanahana, na roto i te aroha o te Atua Metua e Ta'na ra Tamaiti fanau tahi, o Iesu Mesia.

Ua ite atura vau e, ua faa'ihia ratou i te oaoa e te popou rahi, e te faaoaoa amui noa ra ratou no te mea, ua fatata roa mai te mahana no to ratou faaoraraa. Ua haaputuputuhia ratou mai te tia i te taeraa mai te Tamaiti a te Atua i roto i te ao varua ra, ia faaora Oia ia ratou mai roto mai i te mana o te pohe. E faaap'ihia to ratou tino ia riro ia ei tino hoho'a tia mau mai te matamua te huru, e tuati-faahou-hia te ivi i te ivi e faatupuhia te mau uaua e te i'o hoi i nia iho i te mau ivi e ô faahou te varua i roto i te tino repo e ore te tino e te varua e faataa-faahou-hia, ia noaa ra ia ratou te i i te oaoa.

A tia i noa'i teie nei mau varua rahi mai te paraparau, e te faaoaoa hoi i te taeraa mai te hora no to ratou faaoraraa no roto mai te mau fifi no te pohe, tae maira te Tamaiti a te Atua faatiamâ atura Oia i te mau varua o te haapao maitai, e i reira ra Oia i a'o atu ai ia ratou i te evanelia, te ture no te tia-faahou-raa e te faaoraraa i te taata atoa no te hi'araa, e te matararaa hoi i ta ratou iho mau hara, mai te mea e tatarahapa ra to ratou. Area râ aore Oia i haere io te feia parau-tia-ore, e aore atoa To'na re'o i parau atu io te feia paieti ore e te feia tatarahapa ore, o tei faafaufau ia ratou iho a parahi ai ratou i roto i te tino i'o nei, e te feia orure o tei ore i farii i te mau a'oraa a te mau peropheta, aore atoa ratou i ite atu i To'na mata. I te vahi i parahi-hia e teie huru feia e poiri ana'e to reira, area râ io i te feia parau-tia ra, te vai mau ra te aroha e te hau, e te faaoaoa ra te feia mo'a no to ratou faaoraraa, e ua tuuhia te turi i raro mai te farii papu atu i te

Tamaiti a te Atua ei Faaora ia ratou mai te pohe mai e mai roto mai hoi i te mau fifi no hade. E tei nia iho hoi i to ratou mau mata te anaana e te hanahana atoa hoi no ô mai i te Atua ra, e ua himene ratou ma te arue atu i To'na ra i'oa mo'a.

Te maere ra vau, no te mea ua ite ihora vau e, te porohaere ra te Mesia i te evanelia na matahiti e toru i rotopu i te ati Iuda ra e to te utuafare hoi no Iseraela, ma te hinaaro ia haapii atu i te evanelia mure ore ia ratou, e ma te parau atoa'tu ia tatarahapa ratou, e a taa'tu ai te ohipa maere rahi e te mau semeio, e te a'oraa i te parau mau mai te puai e te mana rahi, aita rea râ e taata i haapao i To'na re'o e aita rea hoi e taata i oaoa i To'na faaeraa i rotopu ia ratou e aita atoa hoi ratou i farii i te ora io ra i To'na rima. Area râ e mea poto roa To'na raveraa i Ta'na ra ohipa i rotopu i tei pohe ra, oia hoi, te maa taime rii i ropu i To'na faasatauro-raahia e To'na tia-faahou-raa; e te feruri ra vau i nia i te parau a Petero, a parau atu ai Petero i te na ôraa: ua a'o atu te Tamaiti a te Atua i te mau varua i vai na i roto i te tapearaa o tei ore i faaroo i mutaa ihora, i te faaoromairaa roa o te Atua a tia'i i te anotau ia Noa ra, e nafea ia i tia'i ia'na, (ia Noa) ia haapii i taua mau varua atoa ra e ia faaoti nehenehe hoi i ta ratou mau ohipa ia au i te ture i roto i taua maa taime iti poto ra, oia hoi, na mahana e toru.

A feruriruri ai au, araara ihora te mata no to'u mana'o, e i reira ite atura vau e, aita te Fatu iho i haere io te mau varua parau-tia-ore, e te haapao ore, o tei faahapa i te mau ture parau-tia; ua faatia râ Oia i te nuu rahi no roto mai i te mau varua parau-tia ra, e ua maiti Oia i te mau vea ahuhia i te mana, ei reira faaue atura Oia ia ratou ia haere io te mau varua o te vai noa ra i roto i te poiri, ia haapii ia ratou i te evanelia, e oia atoa ia a'o i te evanelia i te mau varua atoa ra a te taata, e ua na reirahia ia i te a'oraa i te eva-

nelia i tei pohe ra, e ua haere atura te mau vea i haamana-
hia ia poro haere i te mahana hanahana o te Fatu ra, e ia
a'o atu hoi i te tiamâraa i te mau tîti i taamuhia ra; oia ia,
ia ratou atoa o te tatarahapa e o te farii i te evanelia. Ua
na reirahia ia i te haapiiraa atu i te evanelia ia ratou tei pohe
i roto i te hara, mai te ite ore i te evanelia, e oia atoa ia ra-
tou tei pohe i roto i te hara mai te ite i te evanelia, e te faaba-
paraa i te mau peropheta. Ua haapiihia te faaroo i te Atua
ia ratou, e te tatarahaparaa i te mau hara, e te bapetizoraa
i te feia ora no te feia i pohe ei haamatararaa i te mau hara,
e te tuuraa i te rima no te horoaraa i te Varua Maitai, e te
taatoa atu â o te mau ture o tei tia ia noaa ia ratou te ite no
te faaineineraa no te haavâraa ia ratou i te hoê â haavâraa
i to te taata ora nei, ia ora râ ratou i te Atua i te varua.

E ua na reirahia ia i te faaiteraahia i tei pohe ra, i te
mau varua rii e te mau varua mana rahi, e i te parau-tia e te
parau-tia-ore hoi, ua ite ana'e ratou na roto i taua faaiteraa
ra e, ua tatarahia te mau fifi no te pohe na roto i te tarae-
hara a te Tamaiti a te Atua i To'na faasatauroraahia. Ua na
reira-atoa-hia te faaiteraa mai i te ohipa i ravehia e te Faa-
ora i roto i te maa taime iti poto a parahi ai Oia i te ao va-
rua ra, i te haapiiraa'tu e i te faaineine-atoa-raa i te mau va-
rua parau-tia ra te mau peropheta o tei faaite ia'na i roto i
te tino repo ra ia tia ia ratou ia poro haere atu i te ora i te
feia atoa i pohe ra, tei ore e tia i te Mesia iho ia haere ia
farerei no to ratou haapao ore, e no to ratou orure Ia'na ra,
ia faaroo atoa ratou i Ta'na parau na roto i To'na ra mau
tavini raverave.

I rotopu i te mau varua mana rahi e i te mau varua parautia
i haaputuputuhia ra, o Adamu te hoê o ratou ra, o te metua
hoi oia no tatou atoa e o Eva te metua vahine hanahana,
tei reira atoa oia e to raua na tamahine e rave rahi o tei ora

ê na e o tei haamori i te Atua mau, te Atua ora. O Abala te maratiri matamua, tei reira atoa oia, e to'na tuaana o Seta te hoê o te mau varua mana rahi o tei hamanihia ei ho'ho'a mau o to'na metua o Adamu. O Noa, o tei a'o mai i te diluvi ra, te tahi hoi; o Sema, te tahu'a rahi, tei reira atoa oia; o Abarahama, te metua no te parau-tia tei reira oia; tei reira hoi o Isaaka, o Iakoba, e o Mose o tei horoa'tu i te mau ture i to Iseraela; tei reira atoa hoi o Isaia, o tei faaite mai na roto i te tohu e, ua faatahinuhia te Mesia ei faaora i te feia aau oto, ei faaite i te tiamâ e te ora i te tîti: e ia matara roa te feia tapeahia i te fare auri ra.

E te vai atura hoi, tei reira o Ezekielia o tei ite na roto i te hoê orama i te hoê peho i i te ivi mārô o te ahu-faahou-hia e te i'o ia ho'i faahou mai ratou ei tino ora i te tia-faahou-raa o tei pohe ra; tei reira hoi o Daniela o tei ite e o tei tohu i te faatia-faahou-raa i te basileia a te Atua i teie nei mau mahana hopea nei o tei ore roa ia e mou faahou, e ore hoi e riro ia vetahi ê; tei reira atoa Elia o tei fâ mai raua o Mose ra i nia i te mou'a no te faahuru-ê-raa a te Mesia ra, tei reira hoi o Malaki te peropheta o tei tohu i te taeraa mai ia Eliaha, e taua Eliaha ibora, o te peropheta ia ta Moroni i faaite i te peropheta ia Iosepha Semita, i te na ôraa e, e haere mai oia, o Eliaha, hou te tupuraa mai o taua mahana rahi mātā'u, ri'ari'a o Iehova ra.

Te ohipa a te peropheta ra o Eliaha, o te tanuraa ia i roto i te mau aau o te mau tamarîi, te parau i parauhia mai-ra i ta ratou mau metua, e ua faaite-ê-hia na oia, o Eliaha i te ohipa rahi e te hanahana hoi e ravehia i roto i te mau hii-ero o te Atua Teitei ra, i te tau hopea mau o te mau tau atoa ra, no te faaoraraa i tei pohe ra, e no te titirora i te mau tamarîi i to ratou mau metua, oi tairihia te ao taatoa nei i te ino, e haamou-roa-hia'tu, i Ta'na ra taeraa mai.

Te taatoaraa o te mau varua i faaitēhia i nia nei, te amui ana'e ra ratou i rotopu i tana mau varua parau-tia ra, e te vai atura, oia ia, te mau peropheta o tei parahi i rotopu i te ati Nephi o tei faaite i te taeraa mai o te Tamaiti a te Atua ra, e te tia i ra ratou i te mahana faaoraraa, no te mea, te mana'o ra ratou e e te vai noa ra hoi tana mana'o i roto ia ratou e, te taa-ê-raa o te varua i to'na tino repo ra o te tītīraa ia. Ua haapii te Fatu ia ratou e, ua horoa'tu Oia ia ratou i te mana ia amui faahouhia â i roto i to ratou tino repo, i muri a'e i To'na tia-faahou-raa-hia, e i tomohia hoi ratou i roto i te basileia o To'na Metua, ei reira e faataronohia'i ratou i te ora tahuti ore, e te ora mure ore hoi, e rave tuati-noa â i ta ratou ohipa mai tei parauhia mai e te Fatu ra, e noaa atoa ia ratou i te mau haamaitairaa o tei tapeahia na ratou o tei haapao ia'na ra.

Tei reira hoi i roto i te ao varua ra te peropheta Iosepha Semita e to'u metua tane o Haeramu Semifa, e tei reira atoa o Biritamu Ione, e Ioane Tera, e Vilifuta Vutarufa, e te tahi atu â mau varua parauhia, o tei maiti-ê-hia'na ia tae mai i te i o te mau tau atoa ra ia tauturu i te paturaa i te niu a te ohipa rahi no te mau mahana hopea nei e i te paturaa i te mau hiero e te raveraa hoi i te mau oroa mo'a i roto i taua hiero mo'a ra no tei pohe. Ua ite papu roa vau e tei rotopu ratou, i te mau varua mana rahi o tei maitihia ei aratai e ei feia mana i roto i te Ekalesia a te Atua. Oia ia, hou to ratou fanau-raa mai ua haapii-ê-hia na ratou e te tahi atoa'tu â mau varua i te haapiiraa matamua i roto i te ao varua ra, no reira ua ineine ratou i te haereraa mai i te tau mau i haapaohia e te Atua ia rave faahou â i te ohipa i roto i te ô vine no te faaoraraa i te taata nei.

Ua ite atoa vau e, i te poheraa'tu te mau orometua ito-ito haapao maitai no teie nei ao, te rave noa ra ratou i ta ra-

tou poro haereraa i te evanelia tatarahapa e te faaoraraa i rotopu i te mau varua o tei vai noa i roto i te poiri, e i raro a'e hoi i te mau taamuraa a te hara i roto i te ao varua o tei pohe, e ora ratou na roto i te taraehara a te Tamaiti fanau tahi a te Atua. E faaorahia te feia i pohe na roto i te tatarahapa e te haapao i te mau ture no te fare o te Atua, oia, te hiero, e ia oti ia ratou i te haapee i ta ratou utua no to ratou haapao ore, e ia tamâhia ratou, e i reira ratou e farii ai i te parahiraa mai te au i ta ratou haapaoraa i te mau ture; no te mea ua riro ratou i reira ei tamarii no te ora.

Ua na reirahia te heheuraahia mai ia'u te faaoraraa i tei pohe ra, e te faaite papu hua'tu nei au e, e parau mau roa ia teie nei orama, ma te haavare ore, e te na reira nei au na roto i te haamaitairaa a Iesu Mesia, Amene.

Ua faaitehia teie nei orama no te faaoraraa i tei pohe ra, i te 31 no Atopa 1918, i na tanturu toopiti i te perisideniraa matamua, i te tino hoê ahuru e ma piti Aposetolo e i te Patereareha, e ua fariihia e ratou taatoa ra.

Iritihia e Eraneta a Rositera.

TE POIETE.

E rave rahi te mau taata o tei mana'o e, e mea poiетehia te taata, oia hoi, hamanihia no roto i te aore. Ua parau-atoa-hia-e, e mea poiетehia teie nei ao, e te mau mea'toa i roto, oia hoi, hamanihia no roto i te aore.

E mea tia maoti ia ia parau tatou i taua parau ra, ia taa papu e, e mea poiетe-mau-hia anei te taata e mea poiетe-atoa-hia anei teie nei ao, e aore râ, e mea hamanihia anei no roto i te Materia.

E mai te mea e, aore to te taata e haamataraa e mea tia ia parau atoa'tu e, aore atoa ia to'na e hopea. E mai te mea e, e haamataraa to'na e mea papu e, e hopea'toa to'na, e

mai te mea e hopea to'na, aore atura ia e faufaa ia tavini tatou i te Atua.

E teie nei, e haamata to tatou feruriraa. Ei hea râ tatou e feruri ai? Ei roto i te irava 5 no te Buka Fafau i te pene 90. Te na ô maira taua irava ra: "E mea mure ore hoi te mau mea rii tumu." Uraa: Teihea mau mea rii tumu i parauhia nei, e mea mure ore ia? Pahonoraa: Te mau mea rii tumu aore a ratou e haamataraa e aore atoa e hopea, o te mau mea atoa ia e vai nei. Te mau mea atoa o tei riro ei tumu no teie nei ao, o te hoê mau mea ia o tei hamanihia no roto mai i taua mau mea rii tumu mure ore ra, no reira, aore to teie nei ao e hopea, no te mea, aore e haamataraa to taua mau mea ra o tei riro ei tumu. Te na ô maira te Genese pene 1 irava 1, 2: "Hamani ihora te Atua i te ra'i e te fenua i te matamua ra. Te vai ano noa te fenua, aore e faufaa, e te poiri hoi i nia iho i te iriatai." I roto i te irava piti nei te ite atu nei tatou e, te vai mau ra te mau mea rii tumu no te fenua e te iriatai. Te na ô maira te irava 6: "Ua parau ihora te Atua, ei reva i rotopu i te pape e te moana," Te vai mau ra te mau mea rii tumu mure ore ra no te mau pape e no te moana hoi. Te na ô maira te irava 9: "Ua parau ihora te Atua, ia pue ê te moana i raro a'e i te ra'i i te vahi otahi ia itea te repo marô." Te vai mau ra te mau mea rii tumu mure ore ra, no te repo marô, e no te moana'toa, hou i parau atu ai te Atua i te moana e, ia pue ê atu, ia itea te repo marô.

E mea tia anei ia ia mana'o tatou e, ua hamanihia teie nei ao no roto i te aore? Eiaha roa e mana'o i te reira. Te ite papu nei râ tatou e, ua hamanihia teie nei ao no roto i te mau mea rii tumu mure ore i vai ê na, e te vai nei â i teie nei, e vai a mure atu. Eaha te i'oa no taua mau mea ra? Te vai nei na parau Latino e piti, oia hoi, "Poiete" e

"Materia." Te auraa o taua parau "Poiete" ra, o te hamaniraa ia i te mau mea no roto i te aore. Te auraa o te parau "Materia" o te mau mea rii tumu mure ore ia.

E teie nei te ite nei tatoŋ e, ua hamanihia teie nei ao no roto i te Materia, e te ite papu atoa nei tatou e, aore roa ia e ravea ia poiete i te hoê mea. Ia ore e vai nei te hoê mea ei tumu, aore atoa ia e mea e tupu mai.

E teie nei, e feruri tatou no te taata. E mea poiетehia anei te taata, aita, aita roa. E mea hamanihia râ te tumu no te taata no roto i te Materia. E materia te tino taata, e materia atoa hoi te varua o te taata. Eaha ia tei faaite mai e, e materia te varua? O to'na mou oreraa ia. E ore te varua e pohe i te poheraa o te tino repo nei, e ore hade, e ore atoa te auahi i te po e haamou i te varua o te taata, no te mea e materia mure ore ia. Aore o'na e haamataraa, e aore atoa o'na e hopea. Eaha ia tei faaite mai e e materia te tino repo nei? O to'na mou-ore-raa ia. Mai teie te huru: Ua tamata te mau taata paari no teie nei anotan i te haamou roa i te tumu no te tino repo nei, na roto i te tutui i te auahi e toe mai râ te rehu, oia, te tumu mau no te tutuiraa, e ua rave faahou taua mau taata paari ra i te rehu auahi no taua tino tutuihia ra, tuuhia a'era ia i roto i te pape taero aamu, oia hoi, acid, e aita râ i mou. Eaha'ta â mea o tei faaite mai e e materia te tino repo nei? O to'na tia-faahou-raa ia. E ore e tia i te fenua ia haamou roa te tumu mau o te tino, e ore atoa ia e tia i te repo ia tapea i te tino. E apiti atu râ te tino repo i te varua e haere raua'toa i te oaoaraa mure ore, e aore râ i te mauui mure ore ra.

Aore roa e tia i te hoê mea ia hamou i te tumu o te tino repo, e aore atoa ia i te varua o te taata, no te mea e, e mea mure ore te materia tumu o te taata e to'na varua hoi.

Eiaha maoti tatou e vare i te parau ra e, e mea poiетehia te fenua e, e eiaha atoa e mana'o e e mea poiетehia te taata.

Toae a Maire.

Mau Parau Apî

Te rahiraa o te moni i pau i te Hau Amui i roto i teie nei tama'i rahi e piti hanere bilioni dala. (\$200,000,000,000), oia boi, hoê tilioni farani, (1,000,000,000,000 f).

Ua riro te basileia Purutia ei hau Repubilita i teie nei. I te 11 no Febuare 1919 i maitihia'i o Feredirika Ebereta ei perisideni no te Purutia.

Ua faaite mai to tatou peropheta, o Hebera Garanata e, ua maitihia e tootoru orometua apî no teie nei mau fenua moana nei, e tae mai ratou i teie nei avae iho, e aore râ i te avae i mua nei.

I te 29 no Tenuare m. 1919 i haamauhia'i te ture no te rahuiraa i te hōoraa i te ava, e te uaina, e te bia, i te fenua ra i Amarika taatoa. Te mana'o nei e, i te 16 no Tenuare i te m 1920 i mua nei e haamata'i tana ture ra i te haapaohia.

Ua mauuruu rahi te mau melo no te Ekalesia Momoni i te iteraa i to te ao fariiraa i te heheuraa i horoahia mai e te Atua ia Iosepha Semita te peropheta ra na matahiti e 87 i mairi a'enei. E tana heheuraa ra ua papaihia ia i te pene 86, no te Buka Fafau, te na ô maira te irava 1:

Mai te mea tei rotapu ia outou te tahi taata inu uaina e te ava taero, inaha, e ere te reira i te mea maitai e aore hoi e tia i mua i te mata o to outou ra Metua. E teie nei â hoi, e ere te ava taero no te opu, no te horoiraa râ i to outou mau tino. E ere atoa te avaava no te opu e te tino, e aore hoi e au i te taata nei, area râ e raau ia no te feia ma'i e te puua ma'i hoi ia ravehia ma te paari e te aravihi. B. F. 89:5, 7,8; B. F. S. 86:1. I teie nei, ua ta-hoêhia te mau mana'o o te mau feia atoa i te hau Amarika

i nia i taua heheuraa iho ra, i teie nei te farii papu nei ratou i ta Iosepha Semita tiaraa i taua heheuraa ra.

E te vai atura te mau ture ta te Atua i horoa mai na roto i Ta'na ra peropheta ia Iosepha Semita, e farii-atoa-hia ia mai i fariihia teie nei ture no te inuraa ava taero, te huru.

I te avae i mairi a'enei, ua tapae mai i Papeete nei te pahi faauta faehau puta no Niu Zelandi. Ua parauhia e, e toru hanere faehau i nia i taua pahi ra. Ua tupu to matou aroha i te hi'o i to ratou mau ati rau te huru, e ua tupu hoi to matou oaoa i te mana'oraa e, o ratou ia o tei tauturu i te haavi i te enemi o tei hinaaro ia faatitî ia tatou atoa.

Te tama'i noa ra te hau Mexico ia ratou ratou iho.

Ua riro te mau pahi manuâ Purutia ei tao'a faufaa rahi i roto i te rima o te Hau Amui.

Ua riro atoa te mau pahi faauta tao'a Pututia ei tao'a faufaa rahi i te Hau Amui. Te mau mauhaa tama'i ua riro hoi te reira ia tatou, no reira e mea papu, eita te Purutia e tamata ia faatupu faahou mai te tama'i. Aore a ratou e ravea i toe mai maori râ ia farii i te parau faaau no te hau amui.

Te tiaj nei tatou i te taeraa mai i te pahi faauta faehau i te mau tamarîi Tahiti. Ua parauhia e tae mai taua pahi ra i te hopea no Me. E taua mahana ra e riro ia ei mahana caoa rahi no te mau metua e te mau hoa atoa o to tatou mau faehau Tamarîi Tahiti.

TOAE A MAIRE, Faaau Parau, Rue Dumont d'Urville, Orovini, Papeete, Tahiti.
 ERNEST C. ROSSITER, Imprimeur, Rue Brea et de la rue Dumont d'Urville,
 Papeete, Tahiti.
